

SAMÞYKKT

um takmörkun á hundahaldi í Kjalarneshreppi.

1. gr.

Hundahald í Kjarlarneshreppi sætir þeim takmörkunum sem settar eru í samþykkt þessari og hér greinir frá:

- a) Allir hundar skulu skráðir á skrifstofu hreppsins, þar sem eigandi hundsins fær afhent þar til gert merki, sem jafnan skal vera í hálsól hundsins.
- b) Árlega skal sveitarsjóði greitt leyfisgjald fyrir þá hunda, sem undanþága er veitt fyrir. Ef sami aðili sækir um skráningu fyrir fleiri en einn hund, skal greiða leyfisgjald af hverjum hundi fyrir sig. Hundur skal að jafnaði hýstur á þeim stað, þar sem hann er skráður. Hreppsnefnd ákveður árlega upphæð gjaldsins í sérstakri gjaldskrá sem heilbrigisráðherra staðfestir. Upphæð gjaldsins skal miðuð við þann kostnað, sem hlýst af hundahaldi í hreppnum. Sé leyfisgjald ekki greitt innan 2 mánaða frá tilkynningu fellur leyfið úr gildi, og telst hundur þar með óskráður.
- c) Skylt er hundaeiganda að hafa hund sinn ábyrgðartryggðan hjá viðurkenndu váttryggingarfélagi. Ábyrgðartrygging er innifalin í árlegu leyfisgjaldi. Gegn framvísun kvittunar fyrir greiddri tryggingu hundsins verður leyfisgjald lækkað sem nemur verði tryggingar hunds hjá tryggingarfélagi Kjalarneshrepps.
- d) Hundurinn skal aldrei ganga laus á almannafæri, heldur vera í taumi í fylgd aðila, sem hefur fullt vald yfir honum. Eigi er leyfilegt að fara með hunda inn í skóla, á skólalóð, í samkomuhús, á barnaleikvelli eða aðra opinbera staði. Á almannafæri (skipulögðu þéttbýli) er leyfishafa skylt að fjarlægja saur eftir hund/a sína á tryggilegan hátt.
- e) Leyfi fyrir einstökum hundum er að jafnaði háð því, að þeir raski ekki ró íbúa hreppsins og séu hvorki þeim né öðrum, sem um hreppinn fara til óþæginda, með tilliti til hávaða, óþrifnaðar, eyðileggingar verðmæta eða slysaðattu.
- f) Ef sótt er um leyfi til að halda hund í sambýlishúsi, skal skriflegt samþykki eiganda/íbúa í húsinu fylgja umsókn. Raðhús telst ekki sambýlishús nema um sameiginlega lóð sé að ræða.
- g) Hundar skulu árlega færðir til hreinsunar. Um hreinsun þeirra fer eftir reglugerð um varnir gegn sullaveiki nr. 201/1957. Gjald fyrir hundahreinsun er innifalið í hundaleyfisgjaldi.
- h) Eigendum þeirra hunda, sem eru smitberar eða grunaðir um að vera smitberar, er skylt að hlýta því, að hundar þeirra séu rannsakaðir, verði þess óskað af heilbrigðisfulltrúa, lækni eða dýralækni.
- i) Hundar sem notaðir eru við búrekstur í hreppum, eru undanþegnir leyfisgjaldi (sbr. lið b). Um þá gilda að öðru leyti öll ákvæði þessarar samþykktar, þar með talin tryggingarskylda sbr. lið c.

2. gr.

Starfsmaður hreppsins skal í samráði við heilbrigðisfulltrúa hafa eftirlit með samþykkt þessari.

3. gr.

Hættulega og óleyfilega hunda og þá hunda, sem ganga lausir utanhúss, skal handsama og færa í þar til gerða hundageymslu. Heimilt er að lóga hættulegum hundum þegar í stað, af þar til kvöddum yfirvöldum.

Sé um handsömun á óskráðum hundi að ræða skal strax auglýsa handsömun hans á tryggilegan hátt, t.d. í útvarpi eða dagblöðum. Verði hundsins vitjað skal ekki afhenda hann

fyrir en skráning hefur farið fram og leyfisgjöld hafa verið greidd sem og áfallin kostnaður (fæði, auglýsingar). Sé hundsins ekki vitjað innan 10 daga frá birtingu auglýsingar um handsömunina má aflífa hundinn. Komi það seinna í ljós hver eigandi hunds hafi verið má krefja hann um kostnað vegna aflífunar.

Sé um handsömun að ræða á skráðum hundum skal tilkynna eigendum þeirra strax um handsömun þeirra. Allan áfallinn kostnað skal eigandi greiða og skal ekki afhenda hund fyrir en kostnaður hefur verið greiddur, ella verði hundur aflífaður. Sé hunds ekki vitjað innan 2ja daga frá því að eigandi veit af handsömun má aflífa hundinn, enda sé eiganda gert ljóst hvað vanræksla á að vitja um hundinn getur haft í fjör með sér. Hreppsyfirvöldum er aldrei skylt að geyma skráðan hund lengur en 10 daga frá handsömun og er heimilt að aflífa hundinn að þeim tíma liðnum náist ekki til eiganda. Áfallinn kostnaður greiðist af eiganda.

4. gr.

Hreppsnefnd er heimilt, hvenær sem er að afturkalla leyfi fyrir einstökum hundum, telji hún þess þörf, t.d. ef hundur er ekki hreinsaður skv. g-lið 1. gr.

5. gr.

Brot gegn samþykkt þessari, eða reglum, sem settar eru skv. henni, varða sektum, nema þyngri refsing liggi við að lögum.

6. gr.

Með mál út af brotum á samþykkt þessari eða reglum, sem settar eru skv. henni, skal farið sem opinber mál.

7. gr.

Ofangreind samþykkt hreppsnefndar Kjalarneshrepps, staðfestist hér með skv. 22. gr. laga nr. 81/1988 um hollustuhætti og heilbrigðiseftirlit, og 1. gr. laga nr. 7/1953 um hundahald og varnir gegn sullaveiki til þess að öðlast gildi þegar í stað. Jafnframt fellur út gildi samþykkt um hundahald í Kjalarneshreppi frá 27. apríl 1984.

Heilbrigðis- og tryggingamálaráðuneytið, 13. febrúar 1991.

Guðmundur Bjarnason.

Ingimar Sigurðsson.

GJALDSKRÁ

vegna hundahalds í Kjalarneshreppi.

1. gr.

Leyfi til hundahalds í Kjalarneshreppi, sbr. samþykkt um takmörkun hundahalds í Kjalarneshreppi, dags. 11. febrúar 1991, skal vera kr. 4 200,00 miðað við ár og kr. 350,00 fyrir hvern byrjaðan mánuð. Gjaldatímabil er frá 1. júlí til 30. júní.

2. gr.

Handsömunargjald skv. 3. gr. áðurnefndrar samþykktar, skal vera kr. 1 000,00 í fyrsta skipti, kr. 2 000,00 í annað skipti og kr. 3 000,00 í þriðja skipti. Ennfremur greiðir hlutaðeigandi auglýsinga- og fóðurkostnað.